

НЕДЕЛЯ АНТИПАСХИ

Еже есть осязание святого славнаго апостола Фомы. Ведати подобает, яко в сей святой день второй недели антипасхи не поются воскресная, но вся праздника.

НА ВЕЛИЦЕЙ ВЕЧЕРНИ,

Повнегда благословити иерею. Христос воскрес: [трижды] И абие поем предначинательный псалом: Благослови душе моя Господа: с пением, якоже есть обычай: и по исполнении сего, стихословим Блажен муж: кафисму 1-ю всю.

На Господи воззвах: поем во глас 1-й, поставим стизов 10. И поем 8 стихирь самогласны, новья недели, Иоанна монаха. Глас 1-й.

Стих: Изведи из темницы душу мою * исповедатися Имени Твоему.

Дверем заключенным, учеником собранным, вшел еси внезапно всеильне Иисусе Боже наш, и став посреде их мир дав, исполнил еси Святого Духа: ждати же повелел еси, и никакоже разлучатися от Иерусалима, дондеже облечутся еже с высоты силою. Темже вопиеш Ти: Просвещение и Воскресение и Мире наш, Слава Тебе.

Стих: Мене ждуть праведницы, * дондеже воздаси мне.

Дверем заключенным ...,

Стих: Из глубины воззвах к Тебе, Господи, * Господи, услыши глас мой.

По днех осмих востания Твоего Господи, явился еси учеником твоим на месте, идеже бяху собрани, и возгласив им: мир вам, неверующему ученику руце показал еси, и пречистое ребро. Он же веровав вопияше Тебе: Господь мой и Бог мой, слава Тебе.

Стих: Да будут уши Твои * внемлюще гласу моления моего.

По днех осмих востания Твоего Господи ...,

Стих: Аще беззакония назириши, Господи, Господи, кто постоит? * яко у Тебе очищение есть.

Фома, глаголемый близнец, не бе с ними, егда вшел еси, Христе, заключенным дверем: темже и не вероваше реченным ему, от неверия в веру известуя. Не несподобил же еси Блаже, показати ему пречистое ребро Твое, и руку и ногу язвы: он же осязав и виде, исповеда Тебе быти Бога не нага, и Человека не проста, и вопияше: Господь мой и Бог мой, слава Тебе.

Стих: Имене ради Твоего потерпех Тя Господи, потерпе душа моя в слово Твое, * упова душа моя на Господа.

Фома, глаголемый близнец ...,

Стих: От стражи утренния до нощи, от стражи утренния, * да уповает Израиль на Господа.

Учеником сомнящимся, во осмый день предста Спас, идеже бяху собрани, и мир дав, Фоме возопи: прииди апостоле, осяжи длани, в нихже гвоздия вонзоша. О доброе неверие Фомино, верных сердца в познание приведе, и со страхом возопи: Господь мой и Бог мой, слава Тебе.

Стих: Яко у Господа милость, и многое у Него избавление, * и Той избавит Израиля от всех беззаконий его.

Учеником сомнящимся ...,

Глас 2-й:

Стих: Хвалите Господа вси языцы, * похвалите Его вси людие.

По востании Твоем Господи, собранным учеником Твоим, и дверем заключенным, посреде стал еси, мир подая им. Веровав же и Фома зрением руку и ребр Твоих, Господа и Бога Тя исповеда, спасающаго уповающыя на Тя Человеколюбче.

Стих: Яко утвердися милость Его на нас, * и истина Господня пребывает во век.

Дверем заключенным, представ Иисус учеником, безстрашие и мир даяше, таже глаголет Фоме, почто мне не веруеши, яко воскресох из мертвых? Принеси семо руку твою, и вложи в ребра Моя, и виждь. Тебе бо неверующу, вси навывоша страсти и воскресение Мое звати с тобою: Господь мой и Бог мой, слава Тебе.

Слава, и ныне, глас 6-й: Иоанна монаха.

Дверем заключенным, пришел еси Христе ко учеником, тогда Фома смотрительно не обретеса с ними. Глаголаше бо: не иму веры, аще не увижду и из Владыки. Увижду ребро, отонюдоуже изыде кровь, вода, крещение. Увижду язву, от неяже исцеле великий струп человеческий. Увижду, како не бе, якоже дух, но плоть и кости. Смерть поправый, и Фому уверивый, Господи, слава Тебе.

Вход. Свете тихий: Прокимен дне: Господь воцарися:

На стиховне стихи самогласны, глас 4-й:

О преславнаго чудесе! Неверие веру известную роди. Рек бо Фома: аще не вижду, не иму веры. Осязав же ребра, богослови Воплотившагося, Тогожде Сына Божия позна, яко пострадавши плотию, проповеда Воскресшаго Бога, и возопи светлым гласом: Господь мой и Бог мой, слава Тебе.

Стих: Похвали Иерусалиме Господа, * хвали Бога Твоего, Сионе.

О преславнаго чудесе! Огню сено коснувшееся спасеса вложив бо Фома во огненная ребра руку Иисуса Христа Бога, не опалися осязанием. Души бо зловерство преложи на благоверие, тепле возопи от глубины душевныя: Владыка Ты еси и Бог мой, из мертвых воскресый, слава Тебе.

Стих: Яко укрепи верей врат твоих, * благослови сыны твоя в тебе.

О преславнаго чудесе! Иоанн на перси Слова возлеже, Фома же ребра осязати сподобися: но он убо отонуду страшно богословия глубокое извлече смотрение: ов же сподобися тайнонауčiti нас. Представляет бо показания ясно востания Его, вопия: Господь мой и Бог мой, слава Тебе.

Слава и ныне, глас 5-й:

Человеколюбче, велие и безприкладное множество щедрот Твоих: яко долготерпел еси, от иудей заушаемь, от апостола осязаемь, и от отметающих Тебе многоиспытuemь, како воплотился еси? Како распялся еси Безгрешне? Но вразуми ны яко Фому вопити Тебе: Господь мой и Бог мой, слава Тебе.

Таже **Н**ыне отпускаеши: Трисвятое. И по **О**тче наш:

Тропарь: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И благоговение хлебов. И чтение Деяний святых апостол. Чтутся же деяния от начала: или беседы Златоустаго от начала.

[зри] Аще несть бдения, по **Н**ыне отпускаеши: и по **О**тче наш: Тропарь **З**апечатану гробу: и отпуст. Во утрии же поем полунощницу воскресную, на нейже поем канон Троичный, октоиха 1 гласа, певаемый по полунощнице. По каноне же Достойно есть: Троичное. И прочее. Трисвятое. По **О**тче наш: тропарь **З**апечатану гробу: **Г**осподи помилуй, 40. Слава, и ныне: **Ч**естнейшую херувим: **Стих: Б**оже, ущедри ны: **И** молитва: **В**семогущая и Животворящая: **И** отпуст.

НЕДЕЛЯ АНТИПАСХИ

НА УТРЕНИ

По скончании же чтения, глаголем шестопсалмие. И по исполнении сих ектения великая. И на Бог Господь поем во глас 7. Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

По 1-м стихословии седален, глас 1-й:

Подобен: Камени запечатану:

Страха ради иудейска, сокровенным учеником, и в Сионе собранным, вшел еси к ним Блаже, и стал еси посреде их, дверем заключенным радостотворяй и показал еси им рuce, и пречистых Твоих ребр язвы, глаголя неверующему ученику: принеси руку твою, и испытай, яко Сам Аз есмь, тебе ради Пострадавый.

Слава и ныне, тойже.

По втором стихословии, седален, глас 1-й:

Подобен: Гроб Твой, Спасе:

Предстал еси Животе, дверем заключенным, Христе, учеником, и ребра показав и рuce Твои и нозе Твои, еже от гроба Твое востание предувверяя: но Фома не обретесе, тем же глаголаше: аще не узрю Его, не верую словесем вашим.

Слава и ныне, тойже. Таже полиелей.

И седален полиелея, глас 1-й:

Подобен: Гроб Твой Спасе:

Видя Моя ребра, и язвы гвоздей, Фома, что не веруеши Моему Воскресению? Господь глаголаше, воскрес от гроба, являясь апостолом неизреченно. Близнец же веровав, вопияше Создателю: Бог мой еси и Господь.

Слава и ныне: тойже.

Посем степенна, 1-й антифон 4-го гласа.

Прокимен, глас 4-й: Похвали Иерусалиме Господа, хвали Бога Твоего Сионе.

Стих: Яко укрепи верей врат твоих.

Всякое дыхание:

Евангелие от Матфея, зачало 116-е, утреннее воскресно 1-й:

Единии же надешате ученицы идоша в Галилею, в гору, аможе повеле им Иисус: и видевши Его, поклонишася Ему: ови же усумнешася. И приступль Иисус, рече им, глаголя: дадеся ми всяка власть на небеси и на земли: шедше убо научите вся языки, крестяще их во имя Отца и Сына и Святаго Духа, учаще их блюсти вся, елика заповедах вам: и се, Аз с вами есмь во вся дни до скончания века. Аминь.

Таже Воскресение Христово видевши: [трижды]. Псалом 50.

Таже Слава: Молитвами апостол, Милостиве: И ныне: Молитвами Богородицы: Посем стихира: Воскрес Иисус от гроба, якоже прорече даже нам живот вечный и велию милость.

Таже Спаси Боже люди Твоя:

И целование Евангелия.

И абие канон праздника, творение Иоанна монаха.

Глас 1-й. Ирмос по дважды, тропари же на 12.

Катавасия: **В**оскресения день:

От днесь начинаем глаголати **По**им Господеви: во всю Пятдесятницу.

Песнь 1.

Ирмос: **По**им вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимущ.

Катавасия: **В**оскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: **У**тверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствовати достойно повелел еси.

Во гробе заключен описанною плотию Твоею, неописанный Христе воскресл еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

Катавасия: **П**риидите, пиво пием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Ипакон, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: **В**елия тайна Твоего Христе, смотра: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуетися испытаеть: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

Катавасия: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: От нощи утреннююще поем Тя, Христе, Отцу Собезначальна, и Спаса душ наших: мир мірови подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемаго Фомы страшнаго начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: Пророка спасл еси от кита Человеколюбче, и мене из глубины предгрешений возведи, молюся.

Фомы не оставил еси Владыко, погружаема глубинное неверия, длани простер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

Катавасия: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизноподательная Твоя ребра Фома испыта Христе Боже: созаклученным бо дверем яко вшел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязимую? Аще бо не бы ребро силу подало брenneй деснице, како можаше осязати, страданьми поколебавшая яже выше, и яже низу? Сия благодать Фоме дадеся, еже сия осязати, Христови же вопити: Господь еси и Бог мой.

Синаксарь в неделю Фомину

Стихи:

Аще ада или из гроба ключ не возбраняет,

Твое Спасе стремление, ключ дверей како возбранить?

В сий день, в неделю вторую по Пасце, обновления празднуем Христова Воскресения, и святого апостола Фомы осязание. Обновлением убо обычай бе древний бывати, на некоторое от нарочитых: лету бо окружающую и той день, воньже тогда содеяно бысть наведшу вещи оная, память творяху летнюю, да не в забвение великая бы дела были. Отсюда евреи первее Пасху в Галгалех сотвориша, Чермного моря прехождение обновляюще. Отсюда сень свидения им обновляется, и многославно. Отсюда царство Давидово, и иная, да не по коемуждо глаголю: елма убо всех яже в житии вещей изряднее больше, и паче всякия мысли дело, Господне Воскресение: не точию на коеждо лето сие празднуем и обновляем, но присно и по осмом дни. Первое убо сего обновление, настоящая неделя, яже глаголалася бы воистинну и осмая и первая. Осмая убо, яко от Пасхи: первая же, яко начало других. И осмая паки: яко во образ вчиняется безконечнаго онаго дне, иже в будущем веце, иже первый, и един будет всяко, ни нощию разсекаемь. Сия убо о обновлениях: а яже о Фоме, сице бысть: Христу воньже день воскресе, позде учеником явльшуся, не бяше Фома, не у с прочими совокуплься, страха ради иудейска. Таже помале нашед, уведа Христово пришествие, не верова, не учеником токмо, яко того видеша воскресша, но яко ниже отнюд воскресе Господь, и сей един сый от двоюнадесятих. Благодетельный же Бог, и о едином убо сице пекийся, купно же и смотрением неким большим, да и паче Воскресение и по сих будущим уверится, оставль дний осмь: да онаго любовь конечную поострит, и паче неверовавый всем веру известншую подаст Воскресения, паки приходит, и дверем заключенным, якоже прежде, сущу же и Фоме, входит и мир обычно подав, посем к Фоме простирается, и глаголет: принеси перст твой семо, и виждь рuce Мои, и принеси руку твою, и вложи в ребра Моя, и не буди неверен, но верен. Понеже бо не точию видением уверитися имел еси за привидение, но скор сый, и осязания помянул еси. Показа же сим, яко внегда сия глаголаше ко учеником, бяше слыша: вложи руку твою в ребра Моя. являет же, яко и широка бяше яже на ребрах язва, яко и руку внутрь вмещати. Фома же опасно испытав, и веру приим осяжением, попускаемь бо бе сия зрети и творити оная, аще и в нетленном и обоженном конечно телеси, за извещение зываше: Господь мой и Бог мой. Ово убо плоти ради, ово же Божества ради. И Христос к нему глаголет: яко видево Мя веровал еси, блажени не видевшии и веровавшии. Близнец же глаголется Фома, или зане с другим родися, или за еже усумнетися о Воскресении, или зане сице от естества слеплен беста ему два перста руки десная, снесть средний, и иже пред онем, глаголемый указательный: негли рекл бы кто, яко усумнетися имяше, и с сими осязати. Инии же глаголют, еже и известнейшее, яко еже фома, близнец толкуется. Второе сие явление Христово. Третье же бысть на мори Тивериадстем в ловлении рыб, егда и пищи причастися, Божественным огнем снестшейся, якоже весть Сам, известнейшее воскресение представляя. Таже во Еммаусе является. Пятое в Галилеи, и единонадесятищи, якоже глаголют, является, дондеже вознесся, многая и преестественная знамения творя, пред ученики по Воскресении: не бо многим сия показоваше. Оставиша же сия вся евангелисти написати, зане не бе возможно сия многим, и в мире живущим

человеком слышати, яко преестественна суща зело. Твоего апостола Фомы молитвами, Христе Боже наш помилуй нас. **Аминь.**

Песнь 7.

Ирмос: Образу служити мусикийскому согласию созывающу люди, от песней Сионских поюще отчески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси.

Един дерзнувый, неверною же верою облагодетельствовавый нас Фома близнец, решит убо мрачное неведение всех концев, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не всуе усумневся Фома о востании Твоем, не низложися: но несумнительное тщашеся показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемыми неслиянно, и верою взываше глаголя: Ты еси Господь превозносимый отцев и наш Боже, благословен еси.

Катавасия: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Песнь 8.

Ирмос: В пламени огненне горящая печи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподоблься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осязана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

Катавасия: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

На 9-й песни, Честнейшую: не поем: но ирмос кийждо лик.

Песнь 9.

Ирмос: Тебе светлую свещу, и Матерь Божию, пречудную Славу и высшую всех тварей, песньми величаем.

Твой светлый день и пресветлый Христе, всесветлую благодать, воньже красный добротою учеником Твоим предстал еси, в песнях величаем.

Тебе брѣнною дланию осязаема в ребра, и не опаливши сию, огнем невестественнаго Божественнаго существа, в песнях величаем.

Тя яко Бога из гроба воскресша Христа, не очима видевши, но сердечною любовию веровавши, песньми величаем.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Таже Свят Господь Бог наш: на глас 1-й. [трижды].

Екзапостилларий, глас 1-й:

Подобен: Небо звездами:

Моих удов рукою твоею испытавый язвы, не неверуй Ми Фома, уязвленному тебе ради, со ученики единомудрствуй, и живущаго проведуй Бога. **[Дважды]**

Слава и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друга вопиюща: Господь и Бог мой.

На хвалитех стихиры, на 4, глас 1-й:

Подобен: Прехвальнии мученицы:

Стих: Хвалите Его на силах Его, * хвалите Его по множеству величества Его.

По еже из гроба Твоем страшном Жизнодавче, востании, якоже печатей не разрушил еси Христе гробных, тако заключенным дверем вшел еси к преславным апостолом Твоим, радостотворя их, и Правый Твой Дух подавая им, за безмерную Твою милость.

Стих: Хвалите Его во гласе трубнем, * хвалите Его во псалтири и гуслех.

По еже из гроба Твоем страшном Жизнодавче ...,

Стих: Хвалите Его в тимпане и лице, * хвалите Его во струнах и органе.

Фома иже и близнец не бе пришел, егда Ты учеником явился еси Господи. Темже не верова Твоему Воскресению, и видевшим Тя вопияше: аще не вложу перста моего в ребра Его и гвоздей язвы, не верую, яко востал еси.

Стих: Хвалите Его в кимвалех dobroгласных, хвалите Его в кимвалех восклицания. * Всякое дыхание да хвалит Господа.

Якоже хочещи осяжи, Христос Фоме вопияше: вложи руку, и познай Мя кости имуща и земное тело, и не буди неверен, равно же со иными уверися. Он же возопи: Бог мой и Господь Ты еси, слава востанию Твоему.

Слава, глас 1-й:

По дней осмих востания Твоего Иисусе Царю, Единородный Слове Отчий явился еси учеником Твоим, заключенным дверем, мир Твой подавая, и неверующему ученику знамения показал еси: прииди и осяжи руце и нозе, и нетленная Моя ребра. Он же веровав, вопияше Тебе: Господь мой и Бог мой, слава Тебе.

И ныне: Препоблагословенна еси, Богородице Дево:

Славословие великое. И тропарь праздника. глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Ектении, и отпуст.

Ведомо буди: Начинаются же от днесь литии, сиречь исхождения в привор. Также и оглашения преподобного отца нашего Феодора Студита, в нихже поем:

Слава и ныне: Стихиру Евангельскую, глас 1-й:

На гору учеником идущим, за земное вознесение, предста Господь: и поклонившася Ему, и данныя власти везде научившеся, в поднебесную посылахуся, проповедати еже из мертвых воскресение, и еже на небеса возшествие. Имже и во веки спребывати Неложный обещася Христос Бог, и Спас душ наших.

Внемли, яко литии в притворе прежде первого часа бывают и оглашения Студитова. И час первый. И прочее обычное. И совершенный отпуст.

Ведомо буди, яко последование случившихся святых во всех неделях Святыя Пятидесятницы поем в повечериях.

НЕДЕЛЯ АНТИПАСХИ

ЛИТУРГИЯ

Часы поются трипсалмнии по уставу в притворе, на нихже глаголем тропарь и кондак праздника.

Ведомо буди, яко от недели новыя и до отдания праздника Пасхи, начало литургии сице бывает:

По еже рещи диакону: **Благослови владыко:**

И иерею: **Благословено Царство:**

И поет иерей: **Христос воскрес:** [2 1/2 раз]

И мы: **И сущим во гробех живот даровав.**

На антифоны, 4 от Песнь 3-й, и 4 от Песнь 6-й:

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствовати достойно повелел еси. [дважды]

Во гробе заключен описанною плотию Твоею, неописанный Христе воскресл еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

Фомы не оставил еси Владыко, погружаема глубинное неверия, длани простер на испытание. [дважды]

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

На вход поем тропарь праздника, глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Слава и ныне: Кондак, глас 8-й:

Любопытною десницею, жизноподательная Твоя ребра Фома испыта Христе Боже: созаклученным бо дверем яко впел еси, с прочими апостолы вопияше Тебе: Господь еси и Бог мой.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: **Х**валите Господа яко благ псалом: **Б**огови нашему да усладится хваление.

Апостол в деяниях, зачало 14-е

(за? д7i) **В**о дни оны, руками апостольскими быша знамения и чудеса в людех многа: и бяху единодушно вси в притворе Соломони. От прочих же никтоже смеяше прилеплятися им, но величаху их людие. Паче же прилагавху верующии Господеву, множество мужей же и жен. Яко и на стогны износить недужныя и полагати на постелех и на одрех, да грядущу Петру, поне сень его осенит некоего от

них. Схождаше же ся и множество от окрестных градов во Иерусалим, приносяще недужныя и страждущия от дух нечистых, иже исцелевахуся вси. Востав же архиерей, и вси иже с ним, сущая ересь саддукейская, исполнишася зависти. И возложиша руки своя на апостолы, и послаша их в соблюдение общее. Ангел же Господень нощию отверзе двери темницы, извед же их, рече: Идите и ставше глаголите в церкви людем вся глаголы жизни сея.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 65-е

(за? ...е) Сущу позде в день той, во едину от суббот, и дверем затворенным, идеже бяху ученицы Его собрани, страха ради иудейска, прииде Иисус и ста посреде, и глагола им: мир вам. И сие рек, показа им руце и нозе и ребра Своя. Возрадовашася же ученицы, видевше Господа. Рече же им Иисус паки: мир вам. Якоже посла Мя Отец, и Аз посылаю вы. И сие рек, дуну и глагола им: примите Дух Свят. Имже отпустите грехи, отпустятся им: и имже держите, держатся. Фома же, един от обоюнадесяте, глаголемый Близнец, не бе ту с ними, егда прииде Иисус. Глаголаху же ему друзии ученицы: видехом Господа. Он же рече им: аще не вижу на руку Его язвы гвоздинныя, и вложу перста моего в язвы гвоздинныя, и вложу руку мою в ребра Его, не иму веры. И по днех осмих паки бяху внутрь ученицы Его, и Фома с ними. Прииде Иисус дверем затворенным, и ста посреде их и рече: мир вам. Потом глагола Фоме: принеси перст твой семо, и виждь руце Мои, и принеси руку твою, и вложи в ребра Моя, и не буди неверен, но верен. И отвеща Фома и рече Ему: Господь мой и Бог мой. Глагола ему Иисус: яко видеви Мя, верова: блажени не видевшии и веровавши. Многа же и ина знамения сотвори Иисус пред ученики Своими, яже не суть писана в книгах сих. Сия же писана быша, да веруете, яко Иисус есть Христос Сын Божий, и да верующе живота имате во имя Его.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.
Аллилуиа, [трижды]

Ведомо буди: Егда же речет иерей: Со страхом Божиим:

И мы: Благословен Грядый во Имя Господне, Бог Господь и явися нам.

Иерей: Спаси Боже люди Твоя:

II вместо тропаря: **Видехом Свет Истинный:**

Мы поем: **Х**ристос воскрес: единожды, и до отдания Пасхи.

Бывает же и прочее Литургии по обычаю.

Во отпусте же егда Иерей речет: **С**лава Тебе Христе Боже, Упование наше, слава Тебе.

Мы поем: **Х**ристос воскрес: [трижды].

Таже отпуст Литургии по обычаю.

На трапезе бывает утешение братии велие. И воставше, от трапезы, глаголем преждеписанная вся в субботу светлая седмицы.